



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

# QUÆSTIO MEDICA,

CARDINALITIIS DISPUTATIONIBUS  
*manè discutienda, in Scholis Medicorum, die Mercurii decimā-nonā,  
mensis Maii, anno Domini M. DCC. LI.*

M. LUDOVICO-ALEXANDRO VIEILLARD;  
Doctore Medico, Præside.

*An menstrua purgatio in lactantibus noxia?*



UOD à parentibus fanis & vegetis ortum ducat  
homo, hoc summum Naturæ munus. Diu namque  
durat domus bonis nixa fundamentis: debilibus  
verò & caducis si fulciatur, citò nutat, citò corrui-  
t. At frustra quis talibus gauderet rudimentis, quæ  
primâ in dies, non roborarentur diatâ. Hujus autem pars optima

A

lac, præsertim muliebre; hinc summâ cautione opus in seligendis nutricibus, quibus lactandi credantur pueri. Quod quidem opus, soli & prudenti Medico fidendum, mulierculis plerumque, fatali nescio quo abusu, committitur. Non sanè tutos à redargutione putavero parentes, qui, dùm sciunt à primis vitæ diebus judicandam esse futuram valetudinem, in re gravis adeò momenti vel levissimè peccant. Quænam porrò dotes à lactantibus exigendæ? Quænam mulieres ab hoc implendo munere arcendæ? Infinitæ. Non tamen illas rejecero, in quibus, aliundè sanis, redündat succi boni copia.

## I I.

**E**TSI nocet omne nimium in corpore humano, tamen ubi nimium hoc absque ullo machinæ dispendio eliminari potest; jam non nocet. Sanguinem irrorat uberius serum, quàm ut possit debitâ quantitate, perspiratione insensili avolare; largior urina secernitur, frequentius spuitur. *Boni habitus ad summum progressi statim solvendi*, ait Hippocrates. Quid refert quonam modo solvantur? Homini valentissimo sanguis modicus è naribus aut è venis hæmorrhoidalibus effluit ab epulis lautissimis. Quid inde mali patietur? In talibus natura, leni conatu, disturbat ea quibus, etsi bonis, forsàn obrueretur, si diutius eadem pateretur in statu, aut si vel levissimum caperent incrementum: quid ab arte prudentius exoptulandum? Modo non absimili res in lactantibus peraguntur: ubera plurimo lacte turgida non siccant tota puer; erumpunt menstrua, quisnam à lactando talem arcebit nutricem?

## III.

**E**VANUIT jam à longo vetus illud præjudicium, quo humori menstruo contagiosa quædam indoles assignabatur. Nemini non notum est sanguinem ex utero stillantem, omninò simillimum esse cætero sanguini; quod si talis excretio intempestivè suppressa aut retardata, diros adeò cieat tumultus, non certè ideo quòd aliquo *miasmate* humores inficiat; sed quòd notâ sibi & familiari viâ expellere non potuerit natura, residuum ex nutritione, aliisque secretionibus. Hinc opibus suis onerata fatiscit. Porrò si talis sit hæc excretio ut in statu naturali abesse

non possit absque maximo discrimine : quodnam poterit mali portendere , in quocumque statu sano ? Data mulier , dùm lactat , cibis solito succulentioribus vescitur , quidpiam de suo demit exercitio , paulò minùs transpiratione deperdit : alimenta sic coquit , ut omnem omninò succum alibilem ex illis extrahat : maximam lactis optimi copiam sugenti propinat : totum puer non ebibit ; residuum ad communem fluidorum alveum revehitur , sicque in dies auctior sanguinis massa , tandèm aliquà vià erumpere gestit : quànàm tutiori , præter uterum , natura superfluum exonerabit ? Multò quidèm magis & lactanti , & puero timendum censeremus , si , quod utero extruditur , aut mammis , aut alteri organo secernendum apponeretur. Quid plura ? Mulieres lactare docuit dura necessitas. Alio si possint pasci modo pueri , jam cessat tale ministerium : possunt ergò mulieres à lactando abstinere. Menstruam verò , ipsa sibi paravit natura purgationem , quâ carere non potest absque imminenti suo discrimine. Ergone , quod sibi in tutissimum juvamen elegit tam bona parens , aliquandò noxium poterit experiri ?

## I V.

**A** primo vitæ exordio repetenda hominis valetudo. Sit ergo *nutrix* nata salubriter. Ipsa bonam suxerit *nutricem* : puero-  
rum morbos aut eluserit , aut alacriùs passa sit. Toto infantiae decursu ætatis suæ ludos amaverit , iisdem abundè indulserit. Laudabilibus interim usa sit alimentis. Menses ipsi non magno molimine eruperint : ab ipsa eruptione , ordine constantissimo recurrerit hæc purgatio. Mens ipsi fuerit hilaris : quæ sunt amara & molesta senserit , sed leviter. Venereos amplexus fugerit , usque dùm corpus totum adeptum sit incrementum. Tertio aut quarto mense à primis amplexibus conceperit. Gestationis tempore concubitum , *neque nimis pertimuerit , neque nimis concupiverit*. Ingrata fugerit , jucunda modè gustaverit. Otium vitaverit , debito indulserit exercitio. Sex primis à partu hebdomadis satiaverit se victu tenui & potu diluenti : crassioribus postea alimentis interdum nutrita sit. His si addantur statura mediocris ; corpus nec obesum nec gracilius , cutis alba , igne paucò scintillantes oculi , dentes albissimi , mammae neque depressæ , neque turgidiores , in habitu & ornatu elegans concinnitas ; certè qui tenet hanc , tenet & *nutricem* ipsis Principibus lactandis aptissimam.

4

Sic natæ mulieri, quo tempore lactat, menses superveniant; quisnam Medicorum ejusmodi excretionem perniciosam judicaverit? Nullus sanè: nec erit qui hanc succi boni exuperantiæ deberi diffiteatur.

V.

MULTO lacte tumentibus mammarum glandulis, vasa perenni compressione coarctata, minùs liberè sanguis permeat: hinc ad alia derivetur necesse est. Tale autem est inter mammarum & uteri vasa consortium, ut his *plethoricis* altera turgescant, depletis verò flaccescant, & vice versâ: hinc in plerisque lactantibus, ex parietibus uteri perpetuum humoris serosi stillicidium. Ejusmodi jacturam non norunt, quæ dùm lactant, menstruam purgationem experiuntur. In his videlicet uteri vasa multò solidiora, difficiiliùs hiant quàm rumpuntur. Hæ excretionem naturæ legibus consonam patiuntur, aliæ morbum. Quicquid obganniat ignara plebs, caveant Medici, ne tales à lactando mulieres arceant, nisi hancce excretionem à quodam morbo oriundam esse, maturo ipsius pateat examine. Porro si in lactantibus nihil habeat in se mali menstrua purgatio; si nihil afferat mutationis in corpore, quis non concluderet?

*Ergò menstrua purgatio in lactantibus non noxia.*

Proponebat Parisiis CAROLUS GILLOT, Barroductæus  
Tullensis, Saluberrimæ Facultatis Medicinæ Parisiensis  
Baccalaureus, A. R. S. H. 1751,  
A SEXTA AD MERIDIEM.

---

Typis QUILLAU, Universitatis & Facultatis Medicinæ Typographi, 1751.